

左恪靖侯奏稿續編

恪靖奏稿續編卷七十一目錄

懇 恩收還成命摺

仍懇 允收成命摺

請 飭催趕解協餉并借山東廣西庫款摺

胡光墉請 予恩施片

劉典請開缺回籍摺

請 飭揚呂潯幫辦軍務片

恭謝 天恩摺

懇 恩收還成命摺

奏爲披瀝愚忱敬懇

天恩收還成命事竊臣於二月二十三日准兵部火票
遞到光緒四年二月十二日內閣奉

上諭欽差大臣大學士陝甘總督左宗棠籌兵籌餉備
歷艱辛卒能謀出萬全膚功迅奏著加恩由一等伯晉
爲二等侯欽此跪誦之下感激涕零不知所措伏念臣
本寒微驟躋通顯蒙

三朝特達之知封圻歷試荷

先皇逾格之擢鈞軸參司凡茲曠世莫覩之遭逢實爲
千載一時之

知遇比以鵠部游魂龍荒假息當邊庭未靖之日正彌
臣勩力之秋仰稟

宸謨肅申

天討

威弧所向逆醜潛消勁旅長驅回疆速復此皆上承
朝廷之勝算下藉將士之同心用能略定窮邊稍呈薄
效乃荷

綸更加

懋賞

獎微勞於籌筆

晉高爵以侯封聞

命自

天慚懷無地况夫巨憝逆誅遐荒遠匿三窟竟貽夫狡
兔偏師不戒於前禽方慙規畫多疎綢繆未預轉沐
恩榮下逮忝竊何堪物貴持盈既盛滿之足懼處非其
據尤凍仄以難安伏懇

皇上鴻慈允收成命俾微臣稍循愚分倍勵匪躬馳驅
更效乎涓埃靖敢共忘夫夙夜所有惶恐待
命之忱謹恭摺瀝陳伏乞

皇太后

皇上聖鑒施行謹

奏
光緒四年三月初五日

光緒四年三月十九日內閣奉

上諭左宗棠奏瀝陳下忱請收回成命一摺前因回疆
底定加恩左宗棠由一等伯晉爲二等侯原以該大臣

督辦軍務力任其難當此疆圉肅清自應特沛殊恩用
彰偉績乃該大臣成功不居彌懷悚仄具見悃忱惟朝
廷錫爵酬庸權衡至當功懋懋賞禮亦宜之尙其勉圖
報稱母再固辭欽此

仍懇 允收成命摺

奏爲

天恩僉渥臣志難安仍懇

允收成命事竊臣於四月初三日准兵部火票遞回原摺後開軍機大臣奉

旨另有旨欽此同日遞到光緒四年三月十九日內閣奉

上諭左宗棠奏懇陳下忱請收回成命一摺前因回疆底定加恩左宗棠由一等伯晉爲二等侯原以該大臣

督辦軍務力任其難當此疆圉肅清自應特沛殊恩用彰偉績乃該大臣成功不居彌懷德仄具見惻沈惟朝廷錫爵酬庸權衡至當功懋懋賞禮亦宜之尙其勉圖報稱毋再固辭欽此聞

命以來夙夜徬徨罔知攸措雖

君父推恩功疑不妨從重而微臣省分名過彌覺難安

伏念臣邊塞督師時經數載倖值遐荒之永奠無非藉羣策以告成而巨愆尙漏刑殊未預綢繆於周索伊黎復遲收復猶阻聲教於堯封况時憂亢旱災祲方殷

皇太后蠲賑頻頒

皇上修省綦切臣台階忝列稽之往代策勉固有難辭
變理攸司反諸寸衷自效尤所宜亟以咎徵之占言之
恒風恒暘厥有由也以交儆之義言之維月維日曷敢
忘諸若復濫膺高爵更忝侯封是

寵錫備荷

鴻施而悚仄終股蟻惴伏念

朝廷爵賞自有權衡而臣下心所難安亦宜委曲上陳
冀邀

聖納固非敢飾讓以鳴高亦不敢冒榮以速謗伏懇
天恩允收成命庶臣得安愚陋稍免愆尤不勝惶悚
息待

命之至謹繕摺瀆陳伏乞

皇太后

皇上聖鑒訓示施行謹

奏
光緒四年四月十四日

光緒四年四月二十九日內閣奉

上諭左宗棠奏仍懇允收成命一摺所稱回疆底定巨

熟稽誅各省災祲又復疊見正君臣交儆之時不敢濫
膺高爵等語具見敬畏之忱實堪嘉尙際此時艱孔亟
該大臣於應辦事宜殫竭忠誠妥爲籌畫卽所以圖報
稱而濟艱難至該大臣兩次陳請固非飾讓鳴高而錫
爵酬庸朝廷亦當有以示勸著仍遵前旨毋再固辭欽
此

請 飭催趕解協餉並借山東廣西庫款措

奏爲臣軍存餉將罄亟籌接濟請

旨飭催各省關提前趕解協餉并請

飭下廣西山東撫臣各借庫款存銀以濟急需恭摺馳

陳仰祈

聖鑒事竊臣軍餉項上年奏蒙

天恩飭撥庫款一百二十萬兩并

恩准籌借洋款五百萬兩上年秋冬間陸續撥解到甘

將士感荷

仁慈踴躍前驅所向克捷戎機迅順回疆一律肅清惟
部款未到洋款商借未成之先臣因懸軍深入數千里
轉饋維艱不得不預爲籌畫亟飭滬鄂陝各台局息借
各華商銀一百數十餘萬兩暫應急需俟洋款借到分
批劃還曾經

奏明在案華商借款外積欠洋行軍火鎗礮等項價銀
三十餘萬兩均飭由洋款劃還上海採運局道員胡光
墉稟擬劃存洋款銀三十萬兩採買洋米運解陝甘備
賑臣以東洋米價雖賤由海口水運樊襄脚價亦輕本

爲合算惟由老河口溯丹浙之流小舟撥運龍駒寨改由陸路運陝西腳費數倍於米價再由陝運甘腳價之多尤不勝計且陝西正採兩湖稻米運陝救飢水陸同出一途運道尤虞擁擠人畜之力亦難分濟已緘商停辦所劃存之三十萬兩尙未解到計借洋款五百萬兩除劃還借欠各款一百八十餘萬兩外實解臣軍支用者不過二百八十餘萬兩此洋款入數也各省關應協光緒三年分西征糧餉除山西湖北兩省起解不足四成河南僅及四成外餘均在八成以上合計雖有七百

餘萬兩內應除統收分解各款不計外又除舊解洋款
應按年劃還本息銀一百二十五萬兩實借臣軍支用
者不過三百八十餘萬兩合部款協款洋款三者并計
收到實入之數七百數十萬兩光緒三年分及四年五
月內外賴以支持一載有餘者以此其中尚有裁撤馬
步各營清還積欠之餉慶陽辦賑及災歉各區撫卹之
費代河南山西墊發張曜金運昌兩軍餉糧運費那墊
英翰明春金貴等餉糧籌發陝西鑿井救旱工賑銀十
萬兩及撫臣商借運費銀二十萬兩籌發本省慶陽二

郡及各屬災歉之區應需賑撫各費新疆迪化州屬屯
銀牛籽及運費總計又成鉅款凡此皆非臣軍經常餉
需用款而除軍餉外別無可指待撥既繁時艱同值不
得不通融挹注以顧急需入款將竭出款頻增臣與劉
典往復籌商焦煩無策幸值回疆戡定亟宜從長計議
經費之宜節者節之利源之宜開者開之庶期還復舊
觀重睹承平之效關內裁併勇營改行糧章程爲坐糧
歲可節省銀數十萬兩關外南路就近採銅鑄錢以便
民舉辦稅釐以裕課疏通財貨以利商清查官田以正

賦節省轉運以助餉如果經理得宜行之以漸歲可增銀數十萬兩容當條舉縷陳以備

聖明採擇惟興辦之始均須發給現銀乃可徐收成效而臣軍餉源既涸無可爲謀惟聞山東廣西兩省近來庫存尙裕冀可通融臣已備緘牘商之撫臣文格請其代爲籌措將山東應協之餉提前四年起解倘四年中山東遇有急需仍可由各省關協臣酌餉內徑行截留咨臣具

奏廣西本無協濟臣軍之款如提庫存銀一百萬兩起

解除初年不計外由臣於湖南協臣西征的餉內分年撥還歸款倘四年中廣西遇有急需仍可由臣劃撥鄰近各省的餉陸續還款務歸有著文格與臣相知最深楊重雅與臣相處最久當能推誠許與也伏乞

飭下文格楊重雅設法通融接濟共權時局在兩省無所損而臣得及時料理俾免息借之耗裨益實多其各協餉省分除山西河南見請停緩不計外湖北一省上年解餉不及四成其餘廣東福建浙江江西江蘇湖南山東四川閩海關各省關上年協濟西征餉項均在八

成以上疆臣力持時局西征將士感荷同聲惟有仰懇
天恩飭下各督撫將軍臣提前趕解大批協餉以資接
濟仍照上年解足八成以上俾微臣得免掣肘之虞大
局幸甚謹恭摺馳陳伏乞

皇太后

皇上鑒訓示施行謹

奏

光緒四年三月初五日

軍機大臣 字寄光緒四年三月十九日奉

上諭左宗棠奏軍餉將罄請飭催各省關趕解協餉并

將購解來甘如前購之布洛新後膛螺絲開花大礮用
攻金積堡賊巢下堅堡數百座攻西甯之小峽口當者
辟易上年用以攻達坂城測準連韓安夷震懼無措賊
畏之如神官軍亦羨為利器爭欲得之現在陸續運解
來甘者大小尙存數十尊後膛馬步鎗亦數千桿各營
軍刃利無前關隴新疆速定雖口兵精亦由利器則胡
光墉之功實有不可沒者至軍餉項全賴東南各省
開協款接濟而催領頻仍轉運艱險多係胡光墉一手
經理遇有缺乏胡光墉必先事籌維借湊預解洋款遲

到則籌借華商鉅款補之臣軍倚賴尤深人所共見此
次新疆底定核其功績實與前敵將領無殊臣不敢稍
加矜詡自蹈欺誣之咎亦何敢稍從掩抑致負捐助之
忱茲就胡光墉呈報捐賑各款合計銀錢米價綿衣及
水陸運解腳價估計已在二十萬內外而捐助陝甘賑
款爲數尤多又歷年捐解陝甘各軍營試驗膏丹丸散
及道地藥材凡西北備覓不出者無不應時而至總計
亦成鉅款其好義之誠用情之摯如此察看紳富獨力
呈捐無如其多者合無仰懇

天恩俯准將布政使銜江西補用道胡光墉
破格優獎

賞穿黃鳥褂以示優異之處伏候

聖裁謹會同陝西撫臣譚鍾麟合詞附片具

奏伏乞

聖鑒訓示施行謹

奏

光緒四年四月二十九日內閣奉

上諭左宗棠奏請將捐輸鉅款之道員獎敘等語道員

胡光埔捐銀助賑前據梅啟照奏請覈獎業交戶部覈給獎敘至該員歷年隨辦西征軍火籌運餉項一切均無遺誤其勞績實與前敵無異自應量予鼓勵胡光埔著賞穿黃馬褂該部知道欽此

劉典請開缺回籍摺

奏爲暫辦軍務臣劉典病難速痊親年篤老急求歸養
顯懇

天恩俯允所請以遂微忱並懇

飭令秋間回籍俾資兼顧恭摺馳陳仰祈

聖鑒事竊臣於三月二十六日欽奉

上諭劉典奏請開缺回籍養親並就醫治病一摺據稱
現在新疆肅清軍務大定關內防營一時縱難盡裁督
臣可以就近兼顧毋須另員照料伊母衰病愈增需人

侍奉並白陳病狀請開缺回籍養親治病等語關外軍
務告竣一切善後事宜尚須籌畫所有後路防營及轉
運各事該大臣是否可以兼顧無須劉典幫辦之處即
審斟酌情形奏明辦理將此諭令知之欽此臣維劉典
奉

命劃辦陝甘軍務於今三載漢回又安兵民和輯固已
成效可觀凡整軍節餉可以裨益地方及生聚教訓可
爲民間久遠計者無不殫誠竭慮竭勉圖之陝甘官紳
士民兵勇具有見聞無煩覲縷臣頻年壹志經營關外

新疆內顧無虞實賴劉典之同心裨贊現在新疆軍務雖竣而謀及久長莫如置省開設郡縣事關大局宜慎其始北路鎮迪一道雖粗具規模然自準部夷滅後漢回錯處兵燹之餘遺黎什存一二田疇荒蕪彌望蕭條近時招徠耕墾稍有頭緒然非俟烏魯木齊都統伊犁將軍詳細籌畫不能定議入

告南路自吐魯番以暨入城久爲安集延逆渠竊踞雖官軍長驅迭掃秋毫無犯回民安堵如常較北路尙爲完善惟議設都縣則必正經界察厥瘠以定賦役別險

夷審衝僻分繁簡以定官制有仿內地成法隨宜損益
者有按內地成法應議變通者非俟劉錦棠張曜及各
局員隨時察酌會籌不能定議入

告千條萬緒創始尤難緘牘往返動需兩月有餘臣雖
衰朽餘年仍應暫駐邊關待此議有成乃可回省而關
內正議改各營行糧爲坐糧以期撙節而規久遠尤非
劉典一手經理難期周妥劉典體質素強惟不耐窮邊
寒苦易生疾病每遇冬春卽患喘促氣滿痰嗽暈眩諸
證與臣同病而所患尤劇臣遣人省視偃僕呻吟之狀

知見如聞而猶力疾治事鉅細躬親晨夕靡間屢次稱年已六旬久病之餘精力銳減深以未獲爲

國久効馳驅爲憾母年八十有七近聞衰病侵尋時深憂懼詞多苦楚臣雖再四慰留然觀其情狀實有未敢
遂於上

聞者竊意時近溽暑長途跋涉亦非病軀所宜而劉典經平事宜尙須料量非新秋不能成行合無仰懇

皇仁俯准劉典開缺回籍以便省親養病之處出自
天恩謹據實覆陳伏候

皇太后

皇上聖鑒訓示施行謹

奏 光緒四年四月二十八日

請 飭楊昌濬幫辦軍務片

再臣自咸豐十年奉

命從事戎行卽延致素交襄理營務維時司臣營務者
道員

子諡貞介王開化及劉典楊昌濬三人道義相正處難
與偕實非尋常可比雖異時悲懼離合蹤跡不同而彼

此氣誼交孚至今尙堪覆按楊昌濬以餘杭案去官時
論異同臣固無庸置喙然觀浙民去思之切亦足見其
無負於浙人也茲劉典養親治病實出真忱臣既蒙

垂詢不能不代懇

恩施開缺回籍而新疆善後事務紛繁一時難於就緒
臣既不能分身兼顧則幫辦軍務仍須速覓替人合無
仰懇

天恩特飭前任浙江巡撫臣楊昌濬迅赴蘭州幫辦陝
甘軍務出自

聖裁臣因時事相需起見不敢自安緘默是否有當伏乞

聖鑒訓示施行謹

奏光緒四年四月二十八日

光緒四年五月十五日內閣奉

上諭左宗棠奏撥陳劉典病難速痊親年篤老懇准開缺回籍並請簡員幫辦各摺片通政使司通政使劉典准其開缺回籍前任浙江巡撫楊昌濬著賞給四品頂戴幫辦新疆善後事宜劉典著俟楊昌濬抵甘肅後

再行交卸回籍欽此

恭謝 天恩摺

奏爲恭謝

天恩仰祈

聖鑒事竊臣於四月十四日奏懇

天恩仍允收還成命一摺五月十一日准兵部火票遞

回原摺後開軍機大臣奉

旨另有旨欽此同日遞到光緒四年四月二十九日內

閣奉

上諭左宗棠仍懇允收成命一摺所稱回疆底定巨款

稽誅各省災祲又復迭見正君臣交儆之時不敢濫膺
高爵等語具見敬畏之忱實堪嘉尚際此時艱孔亟該
大臣於應辦事宜殫竭忠誠安爲籌畫卽所以圖報稱
而濟艱難至該大臣兩次陳請固非飾讓鳴高而錫爵
酬庸朝廷亦當有以示勸著仍遵前旨毋再回辭欽此
自

天有命伏地增慙謹卽恭設香案望

闕叩頭恭謝

天恩伏念臣幸際

昌熙躡躋鈞軸荷

聖慈之下逮叨

曠典之甄膺差承

恩命遙頒曠

闕而悚悼靡措茲復

溫綸達賁循牆而偃僂彌虔

申諭母許固辭敢不凜遵夫

成命

錫封既承

異數尙庸圖報於來茲也惟有益嚴畏敬之忱勵從公
而匪懈彌懷忠誠之

訓苟利

國無弗爲勉効涓埃上酬

高厚有所啟臣感激榮幸下懷謹繕摺具

奏恭謝

天恩伏乞

皇太后

皇上聖鑒謹

奏
光緒四年五月十九日

恪請奏稿續編卷七十二目錄

酌定西甯留防做隊餉章摺

護送常清明緒遺骸回旗片

籌借商款以濟要需摺

查獲逆財以充公用片

覆陳新疆情形摺

酌定西甯留防礮隊餉章摺

奏爲酌定西甯留防礮隊餉章仿照土勇營制支發以歸核實恭摺具陳仰祈

聖鑒事竊臣等准前任西甯辦事大臣豫師咨開本年

三月十六日奏陳西甯撤防籌商布置地方事宜一摺
奉

旨知道了著豫師咨行山東巡撫每年撥銀一萬兩解交左宗棠轉解西甯以資應用戶部知道欽此欽遵恭錄咨行前來臣等查豫師移交西甯留防開花洋礮護

勇員弁二百四員名歲只餉銀一萬兩自不能按照楚
軍餉章支發當卽咨商照土勇營制核定計歲支九千
一百餘兩尙餘銀八百餘兩可作爲製造火藥旗幟並
修整軍械之需惟遇閏年應支銀九千九百餘兩則製
造各項實有不敷自當極力撙節隨時彌補所有此項
員弁勇丁薪糧餉銀概自本年四月十一日臣福裕接
印之日起支惟山東搭解餉銀遲速難定而勇丁計口
授食必須按月支領應由臣宗棠按月挪墊撥解以資
散放山東餉銀解到隨時劃還清款此項餉銀概由山

東解交

臣

宗棠轉解所有支發報銷應於年終由

臣宗

棠核明礮隊留防軍餉一併報部

臣

福裕毋庸月報以

歸劃一而免紛歧除將此項員弁勇丁應支餉銀數目
造具簡明清冊咨明戶部立案外所有酌定西甯留防
礮隊支發餉章緣由謹合詞恭摺具

奏伏乞

皇太后

皇上聖鑒訓示施行謹

奏
光緒四年七月初四日

軍機大臣奉

旨知道了欽此

護送常清明緒遺骸回旗片

再據署烏魯木齊提督金運昌贖稱故原任伊犁將軍
臣常清明緒二員從事邊疆服勞盡節俱已仰蒙

優卹惟其骸骨尙滯伊城未知葬所上年十月間故都
統英翰派委分省補用同知直隸州知州田立愔安徽
候補守備高福秀前赴伊犁偵探情形密飭就便訪尋
常清明緒掩埋處所茲據該委員等自伊犁回至烏城

稟稱到伊犁後訪得故原任將軍常清遺骸在金頂寺
官菜園中經當時收埋之纏回呼大拜的罕布拉等指
認確鑿啟土驗視屍軀腐化並骨殖亦不完全緣菜地
屢經鉏耨無從辨認拾取也又於伊犁大城中覓故將
軍明緒並其妻室及二子葬所據錫伯營署總管防禦
阿木昌阿及官兵庫爾都勒等僉稱前將軍明緒於城
陷時與其妻命婦聚存餘藥桶引火自轟先擲其兩子
出城逃生兩子依戀不去火發一併焚死情事慘烈旋
蒙署錫伯營領隊大臣喀爾并阿密派診員升等於燼

灰中檢其遺骨埋大城中緣因火藥轟折骸骨不完倉卒收瘞未遑排檢高福秀等照所指處所啟驗一二符合檢盛木匣護回烏城金運昌仍派該守備高福秀隨英翰遺櫬護送進關六月初一日行抵肅州飭換常清一棺明緒一棺明緒之妻及兩子共一棺率僚屬祭奠如禮令高福秀護隨英翰遺櫬回旗並飭甘肅臬司發給勘合令陝西山西直隸沿途各地方一體照料惟臣行營未帶案卷於常清明緒死事年月及係何旗佐明緒之妻命婦何氏及隨殉兩子何名均無從查悉伏

乞

飭下該部該旗於常清明緒及明緒妻室兩子三棺回
旗時行知該各親屬領歸安葬以妥忠魂謹附片陳明
伏乞

聖鑒訓示施行謹

奏 光緒四年七月十一日

軍機大臣奉

旨另有旨欽此

籌借商款以濟要需摺

奏餉源已涸籌借商款仿照成案請

旨飭下各海關出票各省督撫蓋印速交上海採運局
道員胡光墉交收催取以濟要需恭摺馳陳仰祈

聖鑒事竊臣於光緒三年五月奏准借洋款五百萬兩

洋款到時劃還借欠各款外賸存無多本年三月內曾
縷陳一切並請

飭下山東撫臣艾格將應協之款提前四年起解廣西

無應協臣軍之款請

飭令撫臣楊重雅提銀一百萬兩解濟臣軍臣仍由湖

南西征的餉分年解還歸款初意山東廣西以無息庫

款借濟臣軍本無所損臣借無息庫款暫濟軍用則實

有益疆臣義在奉公固無畛域可言也旋准山東撫臣

織續允提前速解銀三十萬兩尙是大宗廣西則隻字

不覆頃始接楊重雅來文解銀八萬兩而急於索還不

容分年歸款則借與不借等耳入款之可考者如此上

年久旱成災山西河南外陝次之甘又次之除本省賑

務現飭造報容卽具

奏外山西河南應協臣軍之款既請停緩而該兩省常

年應協各軍款項如張曜金運昌兩軍歲均以數十萬

兩計兩省既無可解均須由臣墊發義不容辭陝西除

酌提軍餉接濟外其常年應協蜀軍月餉又須由臣籌

墊軍餉因災爰累固勢所必至也金順一軍本有專餉

近因協款稀至窘蹙日甚臣又不得不代籌挪墊於萬

難設湊中撥現餉十二萬兩以濟要需此外各處零星

點綴尚難悉數出款之約畧可考者如此臣與劉典熟

商餉之源既無可開宜急節其流勉支此局遂議裁併

征營改防營行餉爲坐餉然裁併征營其遣撤員弁勇
丁長夫應發給實餉按照一營計算動需數萬兩防營
議改坐餉其撤遣員弁勇丁長夫仍須照未改章之先
發餉統計須現銀百數十萬兩如果各省均按照定章
八成以上依時起解則通融挪墊尙資敷衍乃自春夏
以來各省協解之款不及從前踴躍頻催固應盼切成
空業由陝西撫臣開單彙

奏在案劉典緘商後路糧臺道員王加敏息借漢口商
號銀四十萬兩又借蘭州票號銀四萬兩勉強支持暫

應目前之急現在新疆正議開設行省需用浩繁尤苦
經費無措臣前因山東廣西庫款未能應手卽緘商上
海採運局道員胡光墉屬其向華商議借巨款並准照
泰西章程設立公司洋行糾集衆商湊貸待借意楚已
楚得利益歸之中華而取攜又較便也旋據胡光墉覆
稱卽日起滬創設乾泰公司招集華商議以五千兩爲
一股聽華商各自摒湊合成鉅款以待而華商復以商
與官交事屬創行終多疑慮爲詞經胡光墉再三譬曉
以來札准一切照洋款成案事本一律別無可疑各華

商雖允以一百七十五萬兩出借而心尙猶豫未能釋
然維時匯豐洋行商人見創設乾泰公司已有成議自
請以洋款一百七十五萬兩附入華款出借合成三百
五十萬兩不居洋款之名胡光墉比以來札設立公司
係專指華款如屢入洋款未免歧互與札意不符婉詞
回覆而洋商又稱此次如允洋商附股並可不由總理
衙門暨稅務司行文印押以免周折胡光墉察其情詞
真切並可使華商釋然無疑遂飛稟請示一面查照向
章各備信銀交存公司定議按月一分一釐五毫起息

由粵海江海閩海江漢五關出票督撫蓋印六年本息
齊還清款每年兩次每次以六箇月爲一期以六年十
二期合計每年需銀五十餘萬兩五關勻攤每關每期
不過增銀數萬兩並清還前次借用洋款本息均仍由
各省應協西征餉項內劃抵初議六月二十日爲期銀
票兩交繼議展至九月二十日兌銀交票請示前來臣
維此次議借華商巨款本擬停借洋款以息羣疑洋商
之聞風堅請附入華款出借實出意外然旣由洋商自
願辦湊附股實非華商招致而來且據匯豐洋行自請

不必總理衙門暨稅務司行文印押可省周折與華款
無所區分似其傾誠許與出自本懷非圖分華商息銀
起見而華商以洋商附股益堅其信可期迅速集事現
值新疆擬置省分設郡縣已有成議一俟借款解齊便
可次第開辦不至稽延一時所耗息銀尙少而將來所
省良多伏懇

天恩飭下各將軍督撫監督查照向章出票益印交胡
光墉祇領遵辦俾得所藉手迅赴事機大局之幸亦微
臣之幸也至各省應協臣軍及新疆各軍餉需款項並

飭部嚴切查催解庶免延誤牽掣之虞愚昧之見是
否有當謹據實馳

奏伏乞

皇太后

皇上聖鑒訓示施行謹

奏
光緒四年八月十六日

軍機大臣奉

旨該衙門速議具奏欽此

查獲逆財以充公用片

再臣准總統老湘各軍通政使司通政使二等男臣劉
錦棠咨稱上年官軍進抵喀什噶爾後安集思酋伯克
胡里即攜眷遠颺各城夷黨亦多聞風逃走所遺銀物
比飭各營局一律查追呈繳以充公用嗣據各營局先
後追繳前來愈稱此次所獲逆財有得自伯克胡里發
與商民營利者有因官軍到境倉皇棄棄者且有各頭
目報明密藏所在因而掘獲者亦有懷德畏威甘以呈
獻者計提督李克常由阿克蘇繳到湘平銀三千五百

七十兩六錢四分提督李泗益由喀什噶爾繳到湘平銀九千五百三十兩一錢七分提督張俊由英吉沙爾繳到湘平銀一千叁百貳拾伍兩陸錢陸分提督譚拔華由葉爾羌繳到湘平銀捌千貳百叁拾肆兩叁錢肆分提督董福祥由和闐繳到湘平銀叁萬貳千伍百壹拾捌兩柒錢伍分又署葉爾羌阿奇木呢牙斯呈繳前在和闐挖出安夷窖銀按照湘平計共重貳萬零捌百壹兩叁錢除提賞呈繳逆財各頭目人等銀肆千捌百貳拾柒兩外實共收到湘平銀柒萬零壹百伍拾叁兩

捌錢陸分提充公用等因呈請查核前來 臣維新疆南路現正設立總分各局籌辦善後一切事宜頭緒紛繁經費甚鉅沿途安設台站馬撥驛書人等口糧工料亦須急爲籌發飭均在於所獲逆財項下動支核實開報理合附片陳明伏乞

聖鑒謹

奏 光緒四年九月二十四日

軍機大臣奉

旨知道了欽此

覆陳新疆情形摺

奏爲遵

旨覆陳仰祈

聖鑒事竊臣於十月十三日承准軍機大臣字寄光緒

四年九月三十日欽奉

上諭一道跪聆之餘敬悉

皇太后

皇上保大定功慎終如始審時度勢策及萬全至意敢
不畢獻其愚仰俟

聖明採酌伏讀

諭旨伊犁在昔爲西路第一重鎮俄人交還以後如何
防守未交以前如何布置伊犁九城縱橫相聯大城西
南此三而舊有卡倫距俄境若干道路俄軍紮至何處
金順現駐庫爾喀喇烏蘇前隊西至何處臣謹按俄人
自據伊犁於西面舊有拱宸瞻德廣仁塔勒奇四城均
棄而弗守傾圮殆盡綏定一城近以之雜置陝回距伊
犁僅三十里伊犁大城人煙甚少俄兵及商戶均萃居
東面惠甯縣春甯遠三城而金頂寺煙戶尤多伊犁管

本俄官名馬依爾品秩不過中國同知通判之類至伊犁之軍者七河巡撫也七河一作七水其官爲固必納三爾其名爲喀爾帕科斯克依所駐阿爾瑪圖地屬俄境在伊犁西八百餘里其兼轄之官名圖爾齊斯坦總督名爲克復滿亦呼高伏滿自稱代國大臣駐浩罕故都塔什干城距我喀什噶爾不過數十程由喀什噶爾至俄邊納林河中隔俄屬布魯特部喀城馬行六日可至從前伊犁本不與俄境相連以哈薩克布魯特種人與浩罕所部安集延及布噶爾所屬爲之隔閼近年俄

人先後脅誘哈薩克布特種人又攻奪浩罕三部據其都城而浩罕屬安集延亦隨風而靡故我北路伊犁南路喀什噶爾之邊境皆與俄屬相接距俄境亦近也伊犁收還以後應於邊境擇要築壘開壕安設大小墩位挑勁兵以增其險至伊犁大城西北之塔勒奇廣仁瞻德拱宸各城戶口鮮存水草却便應各擇要隘暫駐各營分屯其間所有旗綠各營剩存兵丁各給牛種牲畜督令游牧耕墾舊有城堡緩議脩復尙非不可大城以東惠甯熙春海遠各城民戶商戶願遷徙者遷徙願

歸業者歸業邊圉旣奠人安其土耕其野而出其途者
不待招徠迥非甘肅從前東路西路數百千里蒿萊滿
望杳無人煙難於措置可比若烏魯木齊所屬各城相
距甚遠難於照料此伊犁收還以後情形也伊犁未還
之前金順大軍駐庫爾喀喇烏蘇其西精河地方勢處
要隘向駐馬隊以資扼截自福珠哩歸後金順未及派
紮填防致被渙回侵掠金順旋派馬隊二百前往填防
當可無虞由精河西行一日爲永集湖再西數十里卽
伊犁俄官所設之頭卡三日卽抵伊犁中間山徑五道

可達伊犁不由惠甯熙春甯遠三城經過然巖谷幽邃
僅容一人一騎行走不能通車若收還伊犁則驛道山
徑皆成腹地此形勢變遷俄人現在布置官軍防守及
距伊犁道里遠近大畧也

諭旨郡縣之制以民爲本現由嘉峪關烏魯木齊至庫
爾喀喇烏蘇迤西商戶回戶各存若干由吐魯番至南
入城纏頭共存若干除舊有各廳州縣外其餘各城改
設行省究竟合宜與否倘置郡縣有無可治之民不設
行省此外有無良策臣謹按新疆之變起於批路迪他

先守所屬松繼淪陷戶口傷亡最多漢民被禍尤酷以
逆回仇視漢民故也比大軍進剿連拔堅城而昌吉呼
圖壁綏來回民又因畏剿逃奔南路煙戶頓減克復以
來選定安集招徠開墾戶口漸增迪化州各屬尤成效
可觀舊額民戶共四千二百有奇現報承墾者已三千
六百餘戶昌吉縣民戶舊共三千九百有奇現報承墾
者僅四百數十戶阜康縣民戶舊有三千九十餘現報
承墾者僅二百一十餘戶綏來縣民戶舊有三千七百
餘現報承墾者八百五十餘戶奇臺縣舊有民戶四千

三百六十有奇現報承墾者五百七十餘戶濟木薩縣
丞所屬舊有民戶二千八百有奇現報承墾者三百五
十餘戶呼圖壁巡檢所屬舊有民戶一千七百三十有
奇現報承墾者二百八十餘戶庫爾喀喇烏蘇舊有民
戶僅八十有奇現報承墾者尙數十戶精河舊有民戶
四十有奇現報承墾者一百餘戶鎮西廳戶口無考舊
種地六萬畝現報民墾三萬六千餘畝兵墾四千餘畝
土客漸增此北路民戶現存實數也久罹兵燹戶口凋
耗無怪其然鎮迪一道所屬雖孑黎僅存額年散給耕

牛種籽酌發賑糧廣示招徠自木壘河抵精河除戈壁外又均是腴區土客民人及遣散勇丁領地耕墾逐漸增加署鎮迪道周崇傳勤慎廉幹事必躬親漸有明效需之時日百堵皆興卽以目前論之亦非無可治之民也吐魯番舊隸鎮迪道荒地尙少現委道員雷聲遠署同知奎拔妥爲撫輯糧石租稅已逾舊額之半南八城除英吉沙爾壤地褊小烏什土性瘠薄餘均較吐魯番爲饒而喀什噶爾和闐葉爾羌阿克蘇庶而兼富物產豐盈又較各城爲盛劉錦棠張曜悉心經理現委員開

河引渠濟丈地畝修築城堡塘站鑄錢徵釐百廢肇興
具有端緒較之北路尤易爲功是南北開設行省天時
人事均有可乘之機失今不圖未免可惜此新疆之應
改省者一也北路得之準部南路得之回部皆因俗施
治未能與內地一道同風久已概爲邊地伊犁設將軍
又設參贊大臣一員烏魯木齊設都統塔爾巴哈台葉
爾羌均設辦事大臣伊犁等處設領隊大臣五員塔爾
巴哈台烏魯木齊庫爾喀喇烏蘇古城巴里坤吐魯番
烏什英吉沙爾均設領隊大臣哈密設辦事大臣一員

協辦大臣一員葉爾羌設兼管和闐事務協辦大臣一員烏什設幫辦大臣一員喀什噶爾設換防總兵一員是邊地腹地皆一律視之無甚區別與經野馭邊之義不符將軍都統與參贊辦事大臣協辦與領隊大臣職分等夷或皆出自

禁闔或久握兵符民隱未能周知吏事素少歷練一旦持節臨邊各不相下稽察督責有所難行地周二萬里洩兵之官多治民之官少而望政教旁敷遠民被澤不亦難哉北路糧員但管徵收而承催則責之頭目南路

徵收均由回目阿奇木伯克等交官官民隔絕民之畏
官不如其畏所管頭目官之不肖者狎現其民輒以犬
羊視之凡有徵索頭目人等輒以官意傳取倚勢作威
民之怨官不如怨所管頭目也內地徵收常制地丁合
而爲一按畝出賦故無無賦之地亦無無地之賦新疆
則按丁索賦富戶丁少賦役或輕貧戶丁多則賦役反
重事理失平莫甚於此貨幣之制子母不能相權爭訟
之事曲直不能徑達官與民語言不通文字不曉全恃
通事居間傳述顛倒混淆時所不免此非官與民親漸

通其情實去其壅蔽廣置義塾先教以漢文俾其畧識
字義徵收所用券票其戶民數目漢文居中旁行兼注
回字令戶民易曉遇有舛謬卽予隨時更正責成各廳
州縣而道府察之則綱目具而事易舉頭目人等之權
殺官司之令行民之情僞易知政事之修廢易見長治
久安之效實基於此新疆之應改行省者二也夫立國
有疆古今通義傳曰天子有道守在四夷周秦以前姑
弗具論自漢以來通道始於張騫不能得月氏要領求
馬繼以廣利不能下小國堅城漢於西域窮天下之力

以務之卒有輪臺之悔故班固以爲得之無益棄之不爲損也今主棄地之說者祖之臣愚非不謂然顧斷斷於兵不可停地不可棄者蓋以地形無今昔之殊而建置則有因創之異窮變通久因時制宜事固有不容已者謹按新疆開拓肇自

高宗時移涼州西安熱河滿兵延安綏德甯夏興安漢中西甯固原肅州河州安西綠營兵丁駐守南北兩路餉不外增各城養廉經費則以京口杭州等處出旗漢軍俸餉口糧馬乾及甘肅等處所減草料充之計內地

每歲裁減之數共一百二十九萬兩有奇而劃抵新疆
養廉經費一百零七萬八千四百餘兩外尙餘銀二十
一萬一千五百餘兩不特無糜餉之餘且有節餉之實
論者竊以耗中事西疑之於

聖意拓邊節餉固無當也

臣

自度隴以來卽留心稽考

甘肅新疆餉數僉稱承平時每歲約銀五百餘萬兩自
變亂以來冊籍散佚難以覆按請部鈔示成案亦無以
應近據藩司崇保詳稱查得道光二十七年甘肅口內
外駐防滿州蒙古旗綠官兵應需俸餉紅白賞卹等項

銀四百一十五萬二千三百五十三兩三錢九分九釐
四絲一忽內先一年預撥銀一百四十萬兩外銀二百
七十五萬二千三百五十三兩三錢九分九釐四絲一
忽由部臣照依估撥預撥完數以此準之甘肅新疆實
餉五百餘萬之數雖無可考而一歲之中預撥正撥四
百一十五萬有奇則有數可稽也臣竊度南北兩路如
行清丈之法就畝徵賦仿什一之制而從寬定額民收
十數分官徵其一以給軍食尙可有餘修渠濬流以備
旱潦改鑄制錢以便民用設局徵釐以裕課稅創設義

聖教之誡字選調匠師教之藝事自季春至台次第經理甫有端緒容俟各處緝贖取齊卽行具奏此外南北兩路物產尙有藥材皮張吐魯番之棉花和闐之玉庫車之金銅鉛鐵均應設籌及之是新疆利源非無可開也甘肅地處邊陲土曠人稀瘠苦甲於天下承平時錢糧徵收不及東南一大郡此其明徵亂後子黎皮骨僅存氣息僅屬雖頻年拊循休養漸有起色究之致力多而成功少者時地實有以限之通省舊設額兵太多全恃各省協款接濟自中原軍興各省未能兼顧於是回

禍起新疆淪陷甘肅全省名雖僅存實則亡矣幸值

聖明在上洞矚無遺移東南之餘財救西北之奇厄親
賢夾輔內外一心先關內而後關外次第圖之乃有今
日不可謂非幸也此時所當亟籌者善後之策善後之
策當規久遠利鈍所繫匪僅一時以甘肅與新疆並論
新疆利源可開流亦可節甘肅則開源爲難而節流尙
有可議從前額兵之多者一則轄疆與蒙部回番雜處
兵少恐啟戎心一則新疆需由內地撥兵換防兵少難
敷調派也若以現在局勢而言蒙部回番已就鈴束防

營可以漸減前奏改行餉爲坐餉圖節勇餉爲復甘肅
制兵之漸新疆南北如置行省換防之制可以永停又
擬節制兵之餉以紓各省協款之力也竊計甘肅新疆
承平時預撥估撥餉銀四百數十萬兩俟伊犁收還每
歲約可節省百數十萬兩後此利源日增餉更可減部
臣可隨時察酌而任甘肅新疆之事者可隨時陳奏特
恐非微臣所及見耳此統籌甘肅新疆節省餉需以規
久遠之大畧也

諷旨宜於萬難措施之中求一可進可退之計臣愚竊

以爲新疆歲需餉銀二百數十萬兩甘肅歲需餉銀二百數十萬兩本是承平時部臣預撥估撥常例茲當全隴澄清西域收復之時照常指撥於部章並無不合承撥各省當亦無詞况承平時應撥數目內又可節省百餘萬兩此後經理得宜節省或尙不止此實於

國家經出之費不無小補當亦部臣與疆圻諸臣所樂

聞也臣於新疆擬辦各事皆以利民裕

國爲主行省之改與否尙未奏奉

明旨而所籌者無論改省與否兩不相妨可行則行可

止馬止進退尙屬縝然過蒙

聖明矜諒示以轉圜之機若不披瀝直陳止紓

慈念更何以自處至愚衷有未盡者不得不及時陳明

仰祈

垂察臣軍積欠之餉本八百餘萬兩頻年陸續清釐截

至光緒四年尙欠一百數十萬兩近因飭道員胡光墉

息借商款遲遲未到劉典向蘭州票號借銀四萬兩又

飭後路糧台道員王加敏息借漢商銀四十萬兩駐陝

需需局陝安道沈應奎息借票號銀二十萬兩暫應急

需合之開內外新欠餉項及遣撤勇餉又積至二百數十萬兩將來胡光墉解到息借巨款除還陝鄂息借各款點綴新舊欠餉外所餘無幾縱極力割留以備光緒五年應用之需夏末秋初又將告罄前奉

諭旨嗣後無論何項急需不得動輒息借商款致貽後累敢不懍遵惟念甘肅新疆軍務臣既未嘗割款請餉而一切經費又未嘗月款請銷如果此次借用商款外各省協餉均能源接濟臣猶可通挪展轉以期兼顧更何敢動輒息借商款干瀆

宸聰無如各省疆臣身在事外但見西事速了此後需用或可稍紓而頻年悉索以供未免因煩生厭頗催罔應本屬人情之常而臣則勢逼處此莫展一籌將石束手待斃之日可否仰懇

天恩飭下軍機大臣六部九卿公同集議將甘肅新疆從前每年預撥估撥的餉四百數十萬兩指省解濟臣軍並於現協臣軍稍優各省酌撥解濟共足成五百萬兩之數以三年爲期臣得於三年內盡心經理斟酌損益定爲永圖三年以後甘肅新疆軍務既歲所擬開源

節流之策亦必有成效可睹庶以前協款爲甘肅新疆
用兵收復善後之需以後部撥爲甘肅新疆常例應有
之款每年以三百數十萬兩爲度自無不可臣本菲材
屢荷

三朝恩遇忝竊至今當茲時艱孔亟非不思仰體

朝廷憂勤惕厲之懷稍慰各省關類施不倦之意願始
謀未預晚蓋爲難所遇多艱綢繆解補雖有生之目皆
報

國之年而年近七旬神識衰鈍祇承

恩諭實切悚惶謹據實備陳是否有當伏乞

皇太后

皇上聖鑒訓示施行謹

奏
光緒四年十月二十三日

軍機大臣 字寄光緒四年十一月初九日奉

上諭左宗棠奏覆陳新疆情形一摺據稱北路迪化等處自克復以來招徠開墾戶口日增南八城地方富庶現辦開渠丈地鑄錢徵釐諸事具有端緒開設行省於天時人事機有可乘等語新疆設行省事開創始必

須熟籌於事前乃能收效於後日該大臣爲長治久安之計因時通變所奏不爲無見刻下伊犁未經收還一切建置事宜尙難遽定其餘南北各城應如何隨宜經理之處卽著悉心籌畫次第興辦總期先實後名俟諸事辦有眉目然後設官分職改設郡縣自可收一勞永逸之效所有辦理情形並著隨時詳悉具奏至所奏三年以內每年請指撥銀五百萬兩俾得斟酌損益定爲永圖等語著軍機大臣會同戶部議奏將此由五百里諭令知之欽此